

## Yommuu Sodaa fi Rakkoon Cimu-Kutaa 2

### Description

Kutaa darbe keessatti, bo'oo seenaa keessatti qormaata ciccimoo Muslimoota muudatan keessaa duula Khandaq ykn Ahzaab ilaalle turre. Duulli kuni Qureeshota, Ghaxafan fi kanneen biroo walitti qabuun gara loltu kuma kudhaniitiin Madiinaa marsan. Kaayyoon isaanii Muslimoota balleessu ykn duguugudha. Dhugumatti kuni qormaata guddaa sodaan, dhiphinnaa fi rakkoodhaan nama hurgufuudha. Mee itti yaadi, lakkoofsi namoota si deeggaranii xiqqaa ta'anii osoo jiranu, diinni lakkoofsan garmalee baay'ee ta'ee irraa jalaan yoo si marse maaltu sitti dhagahamaa? Garuu akkuma Ibn Useymiin (rahimahullahu) jedhe, "Nama haala akkanaa keessatti kufe malee kana dubbiin ibsuun hin danda'amu."

Sababa koronaatin sodaa fi rakkoon addunyaa ammaa haguugaa jirus xiqqaa miti. Tarii seenaa kana barachuu fi yaadachun obsaa fi jajjabeenya namaaf kenna.

### Muslimootatti Qormaanni cimu

Muslimoonni mataa ofii, magaalaa, qabeenyaa fi maatii isaanii loltu waraana kuma kudhanitti lakkaawamu irraa eeguf of eeggannoo barbaachisuu haa godhaniyyu malee, rakkoo fi qormaata cimaa keessa seenan. Kuni garuu dinqisiisaa miti, seera Rabbii olta'aa keessaa tokko injifannoon rakkoon booda dhufa, mindaa erga qoramani booda argatan, akkuma injifannoon dhiyaatun rakkoon dabala ykn cima.

Haalonna armaan gadi qormaanni fi rakkoon Muslimootatti akka cimu taasisanii jiru:

**1ffaa-**Gosti Yahuudaa Bani Qureyza jedhamtu wali galtee Muslimoota waliin qaban diigun gara duubaatin isaan haleeluf yaalte:

Muslimoonni Bani Qureyza kibba Madiinaa jiraatan waliin wali galtee uuman. Wali galtee waan uumaniif gara duubaatin Bani Qureyzaan Muslimootatti hin duultu jechuudha. Kanaafu, Muslimoonni garee guddaa loltu kuma kudhan of keessa qabutti duuluuf gara fuunduraatti deeman. Kanaaf, booyi qotan. Garuu kana waliinu Muslimoonni amala yahuudaa waan beekaniif, Baniin Qureyza nu ganti jechuun sodaatan. Kanaafu, yoo bani Qureyzaan isaan gante, duubaa fi duraan Muslimoonni ibidda lama jidduutti kufuu jechuudha. Yahuudonni duuba isaanitiin yommuu jiran, loltuun lakkoofsi isaanii baay'ee immoo fuundura isaanitiin jiru.

Hogganaan Bani An-Nadiir dubbii isaa mi'aawaa fi waadaa sobaatin hogganaa Bani Qureyzaa kan ta'ee Ka'ab ibn Asad loltuu gamtoomanitti (Ahzaabatti) akka dabalamu gorse. Oduun Baniin Qureyza wali galtee isaanii akka diigan Muslimoota jidduutti ni faca'ee. Rasuulli (SAW) Baniin Qureyza wali galtee isaa fi isaan jidduu jiru akka diigan sodaataa ture. Kanaafi, Nabiyyiin (SAW) Zubayr ibn Awwaam akka oduu isaanii fiduuf isaanitti erge. Zubeeyris ni deeme. Ergasii ilaale deebi'uun akkana jedhe: "Yaa Ergamaa Rabbii! Mooraa isaanii tottolchaa, [haala salphaan

Muslimootatti duuluuf] karaa isaanii qulqulleessaa fi horii isaanii walitti qabaa akka jiran arge.â€

Banii Qureyzaan wali galte diigu isaanii mallattooleen agarsiisan erga baayâ€™atani, Nabiyyiin (SAW) Saâ€™ad ibn Muâ€™aaz, Saâ€™ad ibn Ubbaadah, Abdullah ibn Rawaah fi Khawwaat ibn Jubeyr erge. Akkanas isaaniin jedhe: namoota kana ilaalchisee wanti nu gahe dhugaa taâ€™mu ykn taâ€™uu dhiisu deemati ilaalaa. Yoo dhugaa taâ€™e, haala ani qofti hubadhuun natti himaa. Namoota hin dadhabsiisinaa (kana jechuun, Bani Qureyzaan wali galtee isaanii diigan jechuun hamilee Muslimootaa hin cabsinaa). Yoo isaan wanta nuu fi isaan jidduutti irratti wali galle guutuuf murteessan, namootatti labsaa.â€

Dhiironni afran kunniinis bahuun gara isaanitti deeman. Isaanis Bani Qureyzaan wali galtee akka diigan ni mirkaneessan. Ergasii gara Nabiyyii deebiâ€™muun nagaha gaafatanii jecha inni qofti hubatuun Bani Qureyzaan wali galtee akka diigde itti himan.

Nabiyyiin (sallallahu aleyh wassallam) ganiinsa Bani Qureyzaa gadi dhaabbannaa fi ijjannoon ni fudhatan. Sababoota fi tarkaanfilee ruuhi muâ€™mintoota (warra amananii) jabbeessan ni fudhatan. Kanaafu, Nabiyyiin (SAW) Salamat ibn Aslam garee namoota dhibba lama of keessaa qabuu fi Zayd ibn Haarisah garee namoota dhibba sadii of keessaa qabu waliin Madiinaa akka eegan erge. Gareen lamaan kunniin banii Qureyzaatti sodaa afuufuf sagalee olkaasun, â€œAllahu akbarâ€™jedhu. Yeroo kana keessatti Banii Qureyzaan garee gamtooman (ahzaab) waliin hirmaachuuf qophaaâ€™an. Garee gamtooman kanatti gargaarsaf jecha gaala diigdama feâ€™aa teemiraa, garbuu fi tiin ofirra qaban ergan. Garuu osoo gaalonni digdamni feâ€™aa ofirraa qaban loltu bira hin gahin Muslimoonni boojiâ€™anii gara Nabiyyii sallallahu aleyh wassallam fidan.


Bani Qureyzaan yommuu loltu gamtoomanitti dabalantu, hoggantoonni warra gamtoomani ni onnatan, ofitti amanamummaan isaanii ni dabale. Muslimoota irratti rakkoon garmalee ni cime. Qurâ€™aanni sodaa fi dhiphinna irraa kan kaâ€™e haala cimaa fi hamaa Muslimoota muudate haala kanaan ibsa.

﴿يَا أَيُّهَا الَّذِينَ ءَامَنُوا أَذْكُرُوا نِعْمَةَ اللَّهِ عَلَيْكُمْ إِذْ جَاءَتْكُمْ جُنُودٌ فَأَرْسَلْنَا عَلَيْهِمْ رِيحًا وَجُنُودًا لَّمْ تَرَوْهَا وَكَانَ اللَّهُ بِمَا تَعْمَلُونَ بَصِيرًا ﴿١﴾  
 إِذْ جَاءُوكُم مِّن فَوْقِكُمْ وَمِنْ أَسْفَلَ مِنكُمْ وَإِذْ زَاغَتِ الْأَبْصَارُ  
 وَبَلَغَتِ الْقُلُوبُ الْحَنَاجِرَ وَتَظُنُّونَ بِاللَّهِ الظُّنُونًا ﴿١٠﴾﴾

â€œYaa warra amantan! Yeroo hoomaan (loltuun) waraanaa isinitti dhufee ergasii bubblee fi hoomaa [malaykotaa] isin hin argine isaanitti ergine, qananii Rabbii isin irra jiru yaadadhaa. Rabbiin wanta isin hojjattan Argaa taâ€™eera. Yeroo gara gubbaa keessanii fi gara-jallaa keessaniin isinitti dhufan, yeroo ijjis [sodaa irraa kan kaâ€™e] dabde, qalbiinis kokkee geessee fi waaâ€™ee Rabbii ilaalchisee yaada [adda addaa] yaaddan, [yaadadhaa]â€ Suuratu Al-Ahzaab 33:9-10

Yaa tuuta warra amanee! Guyyoota Ahzaaba Madiinaa keessatti qananii Rabbiin isin irratti oole yaadadhaa: Yeroo Madiinaan alatti Mushrikooni, Madiinaa keessaa fi naannawa ishii irraa immoo yahuudootaa fi munaafiqonni isin irratti walitti qabaman [qananii Rabbiin isin irratti oole yaadadha]. Gara hundaan isin marsan. Ergasii, garee gamtooman irratti bubbee jabduu dukkaana isaanii buqqistee fi okotee isaanii darbite ni ergine. Samii irraa Malaykoota isin hin argine isaanitti ergine. Sodaan qalbii isaanii keessatti uumame. Rabbiin wanta isin hojjattan hundaa Kan arguudha. Homtu Isarraa hin dhokatu.

[1]



â€œAchitti muâ€™mintoonni ni qoraman, sochii cimaas ni sochoofamaâ€™Suuratu Al-Ahzaab 33:11

In sha Allah kutaa itti aanu keessatti aayaata armaan olii balâ€™innaan ibsa waliin ni ilaalla.

[1] Tafsiiru Muyassar-419

[As-Siiratu Nabawiyyati](#)â€™fuula 598-600â€™, Alii Muhammad Sallaabi

[Noble Life of The Prophet](#) [English]-1366-1369

#### Date Created

April 3, 2020

#### Author

admin